



Coimisiún na Scrúduithe Stáit

Gairmchlár an hArdteistiméireachta

Nascmhodúil

Cás-Staidéar 2015

Earcaigh Mé Teo.

Sa bhliain 1998, bhunaigh Roibeard agus Máire Ó Nualláin gníomhaireacht earcaíochta, Earcaigh Mé Teo. Tá eolas forleathan ar an gcomhlacht i dtionscal na hearcaíochta in Éirinn agus tá ardmheas air. Tá an phríomhoifig lonnaithe i mBaile Átha Cliath ach tá sé cinn d'fho-oifigí acu in áiteanna eile ar fud na tíre. D'éirigh go réasúnta maith leis an gcomhlacht go dtí seo. Rinne an cúlú eacnamaíochta díobháil do ghnó an chomhlachta, áfach. Is é príomhghnó Earcaigh Mé Teo. ná earcaíocht a dhéanamh thar ceann ceithre chomhlacht mhóra ilnáisiúnta. Tuigeann Roibeard agus Máire go bhfuil géarghá le hathrú suntasach treo má tá an comhlacht le teacht slán. Tá clár athstruchtúraithe curtha i gcrích sa chomhlacht anois. Tairgeadh pacáistí iomarcaíochta deonaí agus deiseanna postroinnte do na fostaithe. Nuair a laghdaíodh ar an bhfoireann oibre tosaíodh i gceart ar an gcomhlacht a athnuachan. Tionóladh cruinniú den fhoireann shinsearach bhainistíochta chun an scéal a mheas agus chun plé a dhéanamh ar an treo a rachadh an comhlacht as sin amach. Rinneadh anailís LLDB ar an ngnólacht. Rinneadh plé agus mionscagadh ar smaointe nua agus ar shlí le héagsúlú a dhéanamh sa timpeallacht eacnamaíochta nua. Dá thoradh sin, rinneadh plean gnó agus ráiteas misin nua a fhorbairt.

Is cleachtas gnó í an Fhreagracht Shóisialta Chorparáideach (FSC) a bhaineann le bheith rannpháirteach i dtionscnaimh a dhéanann leas na sochaí. Bhíodh clár láidir FSC ag Earcaigh Mé Teo. riamh. Chun cur lena straitéis FSC, tá sé beartaithe acu iarracht a dhéanamh freastal ar ghrúpa nua daoine atá lorg fostaíochta in Éirinn faoi láthair, i.e. daoine gairmiúla sciliúla a bhíodh ag obair ar feadh na mblianta ach a bhfuil deacrachtaí acu anois post ar bith a fháil. Chun na deacrachtaí sin a sháru, tá Earcaigh Mé Teo. tar éis Clár Gairmeacha a thosú. Cuireann baill foirne ar fáil go deonach é lá amháin sa tseachtain, saor in aisce do dhaoine atá ag cuardach poist. Tá raon seirbhísí á chur ar fáil acu, ar a n-áirítear próifíl phroifisiúnta an duine a fhorbairt, CV a ullmhú agus cleachtadh a dhéanamh ar theicnicí maithe agallaimh. Lena chois sin, cuardaíonn siad poist do na daoine sin saor in aisce agus tacaíonn siad leo iad féin a mheaitseáil le poist oiriúnacha.

D'aithin Earcaigh Mé Teo. réimse eile a bhféadfadh deiseanna fáis a bheith ann: clár chun cabhrú le comhlachtaí eile straitéis FSC a fhorbairt dóibh féin. Cé go dtugann comhlachtaí rathúla tús áite don aschur agus don bhrabúsacht i gcónaí, caithfidh páirtithe leasmhara na gcomhlachtaí sin méid áirithe den fhreagracht shóisialta a chur i bhfeidhm, rud a mbeidh tionchar aige ar an gcleachtas gnó. Beidh Earcaigh Mé Teo. ag cur ina luí ar na comhlachtaí sin go mbeidh orthu dul i gcomhairle leis an bhfoireann oibre agus leis an bpobal áitiúil nuair a bheidh straitéis FSC á chur ar bun, agus go nglacfaidh sé feasacht a bheith acu ar chúrsaí timpeallachta. Is gá, go háirithe, aitheantas a thabhairt don tábhacht a bhaineann le cothrom na féinne, le comhionannas deiseanna, agus le luach gach cineál oibre, obair dheonach san áireamh, i ngach gné de choinníollacha oibre na bhfostaithe, de nósanna imeachta na hearcaíochta, de na cleachtais oiliúna agus ardú céime, agus de bhainistiú daoine.

Thapaigh lucht Earcaigh Mé Teo. an deis le tacaíocht a chur ar fáil d'fhiontair nuabhunaithe. Ós rud go bhfuil fúilleach spáis ina gcuid oifigí, tá siad ag tairiscint deasca a bhfuil na seirbhísí go léir ar fáil orthu ar cíós ainmniúil. Is ionad don lucht gairmiúil é ina bhfuil teacht ag fiontraithe ar aiseanna cló, leathanbhanda agus cumarsáide, i gcomhlúadar daoine a bhfuil an dearcadh céanna acu. Tugann Earcaigh Mé Teo. tacaíocht do na gnólachtaí nua sin atá ag lorg deontas ó ghníomhaireachtaí rialtais, agus bíonn siad ag déileáil leis na himpleachtaí dlí agus cánach a bhaineann le gnólacht á bhunú. Tá súil acu go n-aistroidh na gnólachtaí sin go dtí a bhfoirgnimh féin nuair a bheidh siad ar bun agus go bhfostóidh siad tuilleadh daoine chomh maith. Creideann Earcaigh Mé Teo. go gcuirfidh an obair sin tuilleadh cliant ar fáil dóibh féin san am atá le teacht, cé gur obair neamhbhrabúsach atá ann faoi láthair.

Creideann Roibeard agus Máire go ndeachaigh straitéis an éagsúlaithe i gcion go mór orthu féin, ar a gcuid fostaithe agus ar an gcomhlacht. Bhí siad réidh le dul sa seans le fiontar tomhaiste agus an t-athrú ba ghá a dhéanamh. D'aithin siad an tairbhe a bhain le tarraingt as an nuálaíocht agus as an gcruthaitheacht a bhí sa chomhlacht. Measann siad gur slí dhearfach chun cabhrú leis an tsochaí é an plean gníomhaíochta atá acu chun poist a chruthú. Tá foireann Earcaigh Mé Teo. – agus Roibeard agus Máire mar cheannairí orthu – ardéifeachtach, oile, tiomanta, agus tá an chuid is measa den chúlú eacnamaíochta curtha díobh acu anois. Mar gheall ar an bhfís atá léirithe acu ina gcuid ceannaireachta, agus ar an tacaíocht a thug siad dá bhfostaithe, agus do dhaoine agus do chomhlachtaí eile, tá siad ainmnithe anois i gcomhair gradaim náisiúnta, na bhfiontraithe sóisialta.